

Date – 11/12/2025

Time - 18:30 -18:40Hrs

## AKASHVANI AIZAWL

### REGIONAL NEWS BULLETIN

#### HEADLINES ( EVENING )

1. Chief Minister Pu Lalduhoma'n leilung chereu zel ven nan tlangram lo neih dan piah lamah tlo zawk leh science thiamna hmanga lo neih dan thar sustainable science based farming kalpui a tul thu a sawi.
2. Tourism Minister Pu Lalnginglova Hmar chuan Aizawlah tun thla ni 15 atang ni 20 leh ni 23-ah Winter Festival buatsaih ani dawn a ti a, Krismas leh a chhehvelah intihlimna thianglim tak, kohhran programme tibuai si loa buatsaih an tum thu a sawi.
3. Lai Autonomous District Council ah Indian National Congress leh Zoram Peoples Movement ten Sawrkar intawm siam tumin hma an la mek.
4. Vawiin Rajya Sabha rorel inkhawmah Vande Mataram kum 150 na pual special discussion neih chhunzawm a ni

<><><>

#### CM

Chief Minister Pu Lalduhoma'n leilung chereu zel ven nan tlangram lo neih dan piah lamah tlo zawk leh science thiamna hmanga lo neih dan thar sustainable science based farming kalpui a tul thu a sawi.

Vawiin khan "ICAR Research Complex for NEH Region, Mizoram Centre, Kolasib in ni 2 awn Tribal Sub Plan (TSP) hnuaiia 'Krishi Mela cum State Farmers Workshop' hawna inkhawm buatsaih a hmanpui na ah sawiin Pu Lalduhoma c huan tlangram loneih chu Mizo hnam nunah thuk takin bet tlat mah se, leilung chereu zel leh sik leh sa inthlak danglam avangin leh hma hun ngelnghet an neih zawk theih nan tunlai thiamna changkang zawk hman a tul tawh tih a sawi.

Chief Minister chuan Sorkar flagship programme Banakaih hnuaiiah eizawna bul tan thar tumte hnenah loan hmangin tanpuina an pe a ti a, loneih leh sumdawna bul lo tan tawhte tan CM special package siam ani tih sawiin Aieng, hmarhcha, sawhthing, hmunphiah leh buh thar chhuahte hralhna man tha tak sorkarin a ngaihtuah sak thu a tarlang bawk.

Chief Minister chuan loneitute, ICAR scientist-te leh thalaite chu ram leilung nen inlaichinna tha zawk siama, Mizoram leilung chu eizawna tlo leh hlawk zawk a chantir tur leh state intodelh din turin a sawm a ni.

He workshop chhung hian Line department hrang hrang, FPO leh loneitu hlawhtling ten an thil thar chhuah pholan nan stall 25 an hawng bawk.



## **CM : MZP**

Chief Minister Pu Lalduhoma'n Retheihna leh harsatnate chu min chher hriamtu, mi puitling leh hmantlak ni tura min dinchhuaktu anih thu nizana Woodland Hills, Zonuam-a MZP buatsaih Student's Aid Fund tlangzarhna hun a hmanpui na ah a sawi.

Pu Lalduhoma chuan MZP in zirlai naupang tanpui ngaite tanpuina tur Students' Aid Fund a ngaihtuah chhuak chu lawmawm atih thu sawiin intanpui tawn chuan khawtlang leh ram nuam a siam tih sawiin Retheihna leh harsatnate chu min chher hriamtu, mi puitling leh hmantlak ni tura min dinchhuaktu a ni tiin zirlai naupangte chu taksa leh rilru tichhel turin a fuih bawk.

Minister of State Pu B. Lalchhanzova, pawhin thu sawiin MZP in zirlai harsate chhawmdawlina tur Students' Aid Fund a ngaihtuah chhuak chu tha a tiin a phur hle thu a sawi a, midangte tana luangchhuak duh leh tanpuina pe duh tam tak an awm a, tanpui dan kawng hrelo tam tak awmin he SAF kaltlang hian an rawn luanchhuah ngei a beisei thu a sawi a ni.

MZP President Dr C Lalremruata chuan Student's Aid Fund hnuai dilna lut te chu SAF Guidelines in a tarlan angin Mizo zirlai zirna ina in ziaklut zawng zawngte chauh huapzo tur a nih rualin, Thingtlang lam zirlai, pianphunga harsatna nei an ni a ti a, fund hman danah pawh inkhuahkhirhna dan siamin document diklo hmanga he fund hmuh tum an awm chuan dan angin an chungah hmalak a ni dawn tih a sawi.



## **TOURISM MINISTER : WINTER FESTIVAL**

Tourism Minister Pu Lalnghinglova Hmar chuan vawiin khan a pisaah thuthar thehdarhtute kawmin, Aizawlah tun thla ni 15 atanga ni 20 leh ni 23-ah Aizawlah Winter Festival buatsaih a nih dawn thu sawiin, Krismas leh a chhehvelah intihhlimna thianghlim tak, kohhran programme tibuai si loa buatsaih an tum thu a sawi.

Pu Lalnghinglova Hmar chuan Winter Festival-ah kum danga la awm ngai lo thil thar a awm dawn thu leh kumin Winter Festival thupui tur chu 'Krismas' a nih dawn thu a sawi a; December ni 23-a No Vehicle Zone-ah Krismas hawi costume parade leh carol a awm dawn a, Lammualah luhkhawm leh tur a ni dawn a. Lammual leh a chhehvel pawh Krismas theme-a chei a ni dawn a, charity stall a awm dawn tih sawiin He stall-ah hian mi chanhai zawkte hnen pek leh tur thumhnaw leh thildangte a thawh theih dawn tih a sawi.

Winter Festival chu tun dinhmunah Mizote chauhin hlut mah se, nakinah chuan hnam dang pawhin an la rawn hluta an rawn tel ve ngei a beisei thu sawiin Tourism Minister chuan, hnam dangte'n Winter Festival chhim paha Krismas boruak rawn chhim an duh ngei a beisei a ti a, intihhlimna nen thianghlim taka kohhran programme tibuai si loa Mizo mipuite'n Krismas an hman chu an duh dan a nih thu a sawi.

Tourism Minister sawi danin Winter Festival-ah hian Mizoram pawn atangin artist engemaw zat an lo kal dawn a, concert hmuhnawm tak bakah lâm thiam, stall hrang hrang leh naupang intihhlimna leh infiamna te pawh a awm dawn tih a sawi.

<><><>

## **TOURISM MINISTER PRESS CONF**

Tourism Minister Pu Lalnginglova Hmar chuan tourism infrastructure lamah hmasawna hna thawh mek leh thawh tur cheng vbc 349 point 91 an neih thu leh hlawhtling mai tur eng emaw zat a awm thu a sawi.

Pu Lalnginglova Hmar hian vawiina a pisaa press conference-ah Mizorama rel rawn luh hnuah khualzin an pun nasat thu a sawi a, Aizawla hotel pangngai deuh chu an book khah vek tawh thu leh khualzin an lokal mek lai Mizoram an rawn zin chhan tur leh an cham chhunga an tih tur ngaihtuah a pawimawh thu sawiin, thlawhtheihna emaw rel ticket lak lawkte an duh thin avangin khualzinte an lo inbuatsaih lawk theih nan kum thar atanga hman tur tourism calendar an siam thu a sawi a, tourism tihmasawn tak tak tur chuan infrastructure sak belh teuh teuh lam aiin Mizoram mawina neihsa pholan a, vantlang behchhan (community based tourism) kalpui an duh thu a sawi.

Nakkum atanga hman tur Tourism Calendar-a a lan danin, thla 8 chhungin Mizoram hmun hrang hrangah intihhlimna leh kût chi hrang 13 buatsaih a ni dawn a - January thlaah Phuaibuangah Tlaizawng Paradise buatsaih a ni dawn a; February thlaah Aizawlah International Half Marathon, March thlaah Chapchar Kut, July thlaah Pluck & Pay Festival, September-ah Lo Zawh runpui, October-ah thil chi 3 - Anthurium Festival, Mizoram Travel Fest leh Hanhsik Kût, November thlaah pawh thil chi 3 tho - Mizoram Mountain Challeng (Cycling Event, Red Bull Aizawl Tlang Ruam leh Leitlangpui Music Festival-te buatsaih a ni ang. December thlaah Winter Festival leh Sakawrhmutuai Sunset-te buatsaih a ni dawn bawk.

<><><>

## **AIR NEWS**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

## **LADC**

Lai Autonomous District Council ah Indian National Congress leh Zoram Peoples Movement ten Sawrkar intawm siam tumin hma an la mek.

December 9 a LADC inthlan-a Vote tlate chhiar zawh a nih hnu ah MNF chuan Seat la tamber in Bial 25 ah bial 8 ah hnehna an chang a, Congress chuan bial 7 la in, ZPM in bial 6 an la a, BJP leh Independent ten bial hnih ve ve an la bawk a ni.

Inthlan result hriatkim a nih atangin LADC ah Party mala Sorkar thei an awmlon vangin Sawrkar intawm siam turin Political Party ten hma an la nghal a, hmalakna kal mekah nimin khan Lai District Congress Committee chuan MNF nen inthlan hma atanga thawhdunna an lo siam tawh chu chhu chatin, MNF chu Sorkar siampui tura ZPM lam thurualpui tum leh Congress Member thlem ah an puh a, MNF lamin Congress in an puhna hi chhanletna hriat a la nilo.

Congress leh ZPM chuan District level ah inbiakna thuitak an kalpui tawh niin, a lan dan chuan Congress Member Pu C. Ngunlianbunga kaihhruaina hnuai ah LADC ah Congress leh ZPM Sorkar intawm a pian rin a ni a, District level a inbiakna hi General Hqrs lama Party pahnihte pawmpuina nghah mek niin, vawiin khan ZPM hruaitute, Lawngtlai a Sorkar din dan tur buaipuia kalte chuan Lawngtlai chhuahsanin Aizawl an pan a, ZPM hruaitute hian Chief Minister leh ZPM Leader Pu Lalduhoma an hmu dawn a ni.

Party pahnihte an inrem tuantling thei a nih chuan an hruaitu tur atan an thlanin Governor hnen ah Sorkarna a siam theih thu a thlen hnu ah tihtur tulte tih zawh hnu ah LADC ah Sorkar thar a piang ang.

<><><>

## **MYC PRESS CONFERENCE**

Mizoram Youth Commission (MYC) Chairman Pu Malsawmzuala Ralte chuan ZPM sorkar hnuaiyah MYC kaltlangin thalai 400-in hna an hmuh tawh thu a sawi.

MYC Chairman Pu Malsawmzuala Ralte hian vawiin khan Aizawl Press Club-ah thuthar thehdarhtute kawmin, kum 2024-25 leh kum 2025-26 chhunga MYC hmalakna, hlawhtlinna leh hmachhawpte a tarlang a; MYC Chairman tarlan danin kum 2024-25 chhung khan Hotel Management, Food & Beverage hnuaiyah thalai 122-in hna an hmu a, kuminah mi 136-in an hmu tawh a, kumin sorkar kum kalmek ah MYC coaching class kaltlang hian mi 66-in sorkar hna an hmu tawh bawk.

Pu Malsawmzuala Ralte chuan National Skill Development Corporation nen tangdunin MYC Office Aizawlah Japan tawng zirna hawng turin an indawr mek thu a sawi a, MYC leh Taiwan sorkar thawhdunna kaltanga Mizo nula 1 Chinese (mandarin) tawng zir mek chuan a zo tawh a, a remchan danin MYC office ah Chinese tawng zirna hawn a nih dawn thu sawiin, Learnet Guwahati nen tangdunin MYC chuan Germany-a nurse hna thawk tur Mizo thalai 6 chu german tawng zir tura ziahluh fel an nih tawh thu te a sawi.

Maid Connect Project an kalpui kaltlangin Mizo thalai awmpui hna thawktute tan hamthatna leh venhimna tur duangin, kumthar lamah mumal zawka kalpui an tum thu Pu Malsawmzuala Ralte chuan sawi bawk.

<><><>

## **INDIGO**

Indigo chuan tun thla ni 3 leh ni 5 inkara thlawhna thlawh dan mumal loh avanga tuartute hnenah zangnadawmna cheng sing 1 theuh a pe dawn. Indigo chuan heng zangnadawmna hi travel voucher anga siam a ni ang tih sawiin thla 12 chhungin Indigo thlawhna an chuan leh hunah an hmang thei ang a ti a. Hei bakah

hian sawrkarin kaihhruaina a siam bakah thlawhna thlawh chhuah hun bi tuk atanga chhiar leta darkar 24 chhunga thlawhna thlawk tur cancel sakte chu cheng sang 5 atanga cheng sing 1 thleng zangnadawmna a pe dawn bawk a ni..

<><><>

## **RAJYA SABHA**

Vawiin Rajya Sabha rorel inkhawmah Vande Mataram kum 150 na pual special discussion neih chhonzawm a ni a. Rajya Sabha House Leader leh Union Minister J P Nadda chuan Vande Mataram chu ramchhung mipuite thinlung chawk tho thei hla anih thu leh ram mipuite hnam nunphung nena thlunzawm thei tu a ni a ti a. He hla hian rammin zalenna a sualna kawngah thil thleng pawimawh tak tak a paltlang tih sawiin heng hun lai hian zalenna sualtute thinlungah chak tharna a pe a ni a ti.

<><><>